

35  
mæ Sacramentorum necessitatem, sed omnem substantialem mutationem excludunt. Sane siue Sacramenti alicujus forma aperte in Evangelio inveniatur, siue ex Traditione Divina ortum ducat, nihil licet omnino novare; & quamvis accidentaliter mutatio, quia substantiam Sacramenti non attingit, licet illicita & sacrilega, Sacramenti validitati nihil obstat; essentialis tamen mutatio Sacramentum nullum & invalidum reddit. Idque probat usus Sanctæ Matris Ecclesiæ, quæ semper respuit Baptisma ab Hæreticis collatum, qui a præscripta Sacramentorum forma recessissent, ut dictum est de *Cathaphrygis & Paulianistis a Nicæno I. & a Laodicæna Synodo damnatis.*

§. XII. Catholicam veritatem ratio ipsa plenissime confirmat; nam partes essentielles essentialem mutationem non patiuntur sine essentiali mutatione totius; materia vero & forma (ex *pr. I. & II.*) ex Divina institutione, se se habent tanquam essentialia, quæ Sacramenti essentiam constituunt; ergo ipsarum essentialis mutatio Sacramenta ipsa mutat; irritat igitur, nulla & invalida facit.

#### S C H O L I O N.

Præcipua Novatorum argumenta exponere & refellere conati sumus in *Sch. prop. III.*; advertendum vero hic est, non male a Catholicis rebaptizari, saltem sub conditione, baptizatos a Lutheranis, quia isti pro insatiabili suo in Ecclesiam odio, ut loquitur *Rit. Mechl.*, Sacramentorum formas plerumque invertunt, Magistri sui impudentiam hac in parte sequentes. Non idem vero dicendum de Calvinistis, qui eandem Ecclesiæ formam adhibent, & circa materiam a Christo institutam nihil novare ausi sunt, ut constat ex *Patribus Concilii Rothomagensis opud Zeg. Bern. Van-Espen Juris Eccl. P. II. Sect. I. c. 1. §. XVIII.*